

## **Pol da Pilimon do Papia Mandagit**

*But piso gen*

Pilimon unun man bini tonj amin kinda. Unun Kolosi kokup pap dakon Yesu yolyol amin kinda. Oman monjini kinda mani Onesimus unun amin madepni yipmanj degek pasal kinj kokup kindakon egipgut. Unun kokup papmon Onesimus Pol anjalon anek Yesu yolyol amin dagagit.

Unun bisapmon Pol dam tebanon egipgut, do Pilimon aripmi dima kinj kosak. Mani on papia mandaj Onesimus do iban madepnikon anjigit. Rom dakon gen teban da oman monji kinda pasal kisak kanj, madepni da tagi anjakban kimotjak do yosok. Mani unun papiagwan Pol da Pilimon oman monjini tebai dima iyisak do mandagit. Oman monjini unun Yesu yolyol amin kili dagak, do notnosi yanon da abidosak.

*Pilimon dakon oman monji pasal kigit da don Yesu yolyol amin daganban, Pol da yabekban tobil ae Pilimon do kigit*

<sup>1</sup> Nak Pol, Yesu Kristo yoldat do anek dam tebanon egisat. Nak gat ae notnin Timoti, nit da papia on Pilimon gak do mandamak. Gak notnin tagisi ae pi isalnin.

<sup>2</sup> Nit papia on saminin Apia kisi do mandamak. Ae Akipus Yesu do anek yokwi pabinj yop do nin

gat kalonji emat amanj unjunyo kisi do mandamak. Ae panmuwukbi Pilimon gak da yutnon muwuk muwuk an unjun kisi do mandamak.

<sup>3</sup> Nit Pinjkop Datnin, ae Amin Tagi Yesu Kristo, unjun da nandanj yawot anj daminek butji panjawot aban yawori tosak do bisit amak.

*Pilimon dakon anpakni tagisi do Pol but galaksi nandagit*

<sup>4</sup> Bisapmi bisapmi bisit asaron, nak gak do nandanek Pinjkopno ya yanj iyisat.

<sup>5</sup> Nido, toktogisi amin da yanj nayanj, gak Amin Tagi Yesu nandanj gadanj iminj kimokdol, ae Pinjkop dakon minjat aminyo but dasi galak tanj yominj kimokdol.

<sup>6</sup> Pinjkop da gak anpuluganban yipmanj deri mini minjat aminyokon Yesu do nandanj gadat asal unjun yanj tenjenok abi do Pinjkop bisit iyisat. Yanj anjaki Kristo da yo morap tagisi nimisak unjun do pakyansi nandaki.

<sup>7</sup> Not, gak Pinjkop dakon minjat aminyo morap but dasi galak tanj yominj kimagek butni panjeban asal. Yanj anjaki unjun da kisik kisik madepsi naminjakwan butno yaworisi tosak.

*Pilimon da Onesimus notnosi yanjon da abidosak*

<sup>8</sup> Yo kalonjisi kinda abi do nandisat. Kristo da manon unjun si abi do nak da tebai tagi gayikenj. Mani, anpak tagisi asal unjun nandisat,

<sup>9</sup> do gen tebai dima gayikenj. Amin do but dasi galak tanj yomyom anpak da nit kisi timikdak, do nak gen yaworisok gayikenj. Nak Pol, Yesu Kristo

dakon gen yan tenjenok asat, ae Kristo dakon pi unun do anek dam tebanon egisat.

<sup>10</sup> Monjino Onesimus do anpak tagisi an ibi do gayisat. Dam tebanon egapbo Onesimus nagon apgut bisapmon, nak da Kristo bamisi nandan gadan imjak do anpulugagim. Do unun monjinosi yombem agit.

<sup>11</sup> Kalip gak anpulugok do pi tagi dima agit. Mani abisok pi tagisi anek gak gat ae nak gat kisi tagisi panpulugokdisak.

<sup>12</sup> Abisok yabekgo nak dakon but gat kisi gagon tobil obisak.

<sup>13</sup> Abisok Gen Bin Tagisi yan tenjenok dakon pi do anek dam teban amin egisat bisapmon abidoko gak da tamokon pi asak kan, nak unun do tagisi nandaken.

<sup>14</sup> Mani gak dakon yan dagok dima kanek yo kinda dima aben. Gak da idon egek nak anpulugosak do nandisal kan unun gak dakon galak tok. Nak tebai dima gayiken.

<sup>15</sup> Asi, Onesimus bisap pisipmisok gepman dekgit. Mani yo unun noman tan imgut, unun gak da yokwikon nan ae abidanbi gak gat toktogisi egipjil do bo noman tagit.

<sup>16</sup> Abisok unun gak dakon oman monjigin dima. Asi unun gak dakon oman monjigo egisak, mani abisok gak dakon notgosi dagak do but dasi galak tan ibi. Naga koko notnosi aban but dasi abidosot. Mani nandisat, gak da but dasi galak tan imin kimotdisal. Oman monji pini aban kan galak-tokdisal, ae Kristo do anek gak da kanbi notgosi

anjakwan but dasi galak tanj iminj kimotdisal.

<sup>17</sup> Do Kristo da pikon nit kalonjisi ekwamak yanj kosol kanj, nak opbo but dasi nianj abidanjim, Onesimus do yanj gin abi.

<sup>18</sup> Gagon gulusunj di agit, bo ae gagon goman di agit kanj, mani kulabik anek unun gomanon nak dakon man mandaki.

<sup>19</sup> Nak Pol da naga dakon kisit da papia on mandisat. Nak da naga goman unun sopbenj. Mani nandaki! Nak da gen bami gayiko nandanj gadat agil, do gak nagon gomango tonj. Goman unun gaga dakon egip egipgo. Mani unun do dima yokenj.

<sup>20</sup> Not, nandaki. Amin Tagi da manon gak anpak tagi on nak do abi do nandisat. Nit Yesu Kristo dakon amin ekwamak do unun anpak anek nak dakon but anteban abi.

<sup>21</sup> Papia on mandanjek yanji nandisat, gak da nak dakon gen on guramitdisal. Nak nandisat, Onesimus do anpak akdisal, unun da anpak abi do gayisat unun yapdisak.

<sup>22</sup> Ae nak gen kinda gat tosok. Nak Pinjop da ji dakon bisit nandakdisak, anek nak nepban jikon tobil apdisat yanji nandanj gadasat. Do yutgokon yut buri kinda nak da pokgenj do anjroman abi.

*Pol dakon pi isalni da Pilimon do gildatni tagi yipmanj iman*

<sup>23</sup> Epapras da gildat tagi yanj gayisak. Unun kisi Yesu Kristo do anek dam tebanon ekwamak.

<sup>24</sup> Nak dakon pi isalno, unun Mak, ae Aristakus, ae Demas ae Luk ununyo kisi da gildat tagi yan gayan.

<sup>25</sup> Amin Tagi Yesu Kristo dakon nandan yawot da ji dakon wup gat egipjak do bisit asat.

**PIN<sup>K</sup>OP GEN**  
**The New Testament and Psalms in the Yopno Language**  
**of Papua New Guinea**  
**Nupela Testamen na Buk Song long tokples Yopno long**  
**Niugini**

copyright © 2010 Wycliffe Bible Translators, Inc.

Language: Yopno

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-01-09

---

PDF generated using Haiola and XeLaTeX on 1 Oct 2024 from source files dated 31 Aug 2023

b683ce50-d820-5bfc-8471-d8ee080be106